

Dua murid Orang Asli wakil negara pertandingan robotik di China

Oleh [Mohd Rafi Mamat](#) - November 5, 2023 @ 8:40am
bhnews@bh.com.my



Dua murid Orang Asli bersama pasukan robotik SK Permatang Keledang terpilih mewakili negara pada Make X 2023 International Robotics Competition di Yantai Shandong, China bulan depan. - Foto NSTP/Mohd Rafi Mamat

PEKAN: Dua murid Orang Asli Sekolah Kebangsaan (SK) Permatang Keledang, di sini terpilih mewakili negara ke Make X 2023 International Robotics Competition di Yantai Shandong, China bulan depan.

Aizal Rashid dan Nazril Nazaran, murid Tahun Enam sekolah berkenaan dipilih selepas menduduki tempat kedua kategori Make X Starter pada Malaysia Make X 2023 Robotics Competition di Universiti UCSI, Kuala Lumpur bulan lalu.

Mentor robotik SK Permatang Keledang, Wan Rahmat Wan Ismail berkata ini kali pertama murid Orang Asli terpilih mewakili negara ke pertandingan robotik di peringkat antarabangsa yang menghimpunkan pasukan daripada 63 negara.

Katanya, pengalaman dua tahun dalam bidang robotik dengan menyertai pelbagai pertandingan peringkat daerah dan negeri diharap memberi kelebihan kepada Aizal dan Nazril untuk mencetuskan keputusan yang membanggakan untuk negara.

"Kami menjalani latihan setiap minggu sebagai persiapan menghadapi pertandingan berkenaan yang pastinya begitu sengit dan mencabar," katanya.

Wan Rahmat berkata, untuk menyertai pertandingan robotik di China bulan depan, pihaknya perlu menyediakan perbelanjaan lebih RM4,000 setiap murid bagi tiket penerbangan, hotel dan makan serta pakaian musim sejuk.

"Saya bagi pihak murid mengharapkan sumbangan daripada individu dan syarikat korporat serta agensi kerajaan untuk menyumbang bagi menjayakan misi melakar kejayaan untuk pasukan negeri dan negara," katanya yang bersama dua lagi guru akan turut mengiringi pasukan ke China.